

Evening Dogri (NSD)

13-11-2025

खबरां

1. बिहार असैम्बली चुनाएं तैहत् पाए गेदे वोटें दी गिनतरी कल कीती जाह्ग। वोटें दी गिनतरी दा कम्म बडुलै 8 बजे थमां शुरू होगा।
2. प्रधानमंत्री नरेंद्र मोदी होरें आखेआ ऐ जे केंद्री मंत्रिमंडल आसेआ निर्यातकें लेई दोआर-गरंटी योजना दी मंजूरी कुल संसारी सतह पर मुकाबलेबाजी गी बढावा देने ते बपार-कारोबार दे बवस्थित संचालन गी जकीनी बनाने सने भारत गी इक आत्मनिर्भर राष्ट्र बनने च बी मदाद करग।
3. राष्ट्रपति डॉनल्ड ट्रम्प हुं'दे आसेआ दस्तख्त करने परैन्त अमरीका च सबनें शा लम्मा सरकारी शटडाउन खत्म होई गेआ।
4. बांग्लादेश च, अंतर्राष्ट्री अपराध ट्रिब्यूनल ने घोषणा कीती ऐ जे ओह साबका प्रधानमंत्री शेख हसीना ते उं'दे द'उं सैह्योगियें दे मनुक्खता खलाफ अपराध दे मामले च 17 नवंबर गी अपना फैसला सनाग।
5. भारत ने ढाका च 24मीं एशियाई तीरंदाजी चैम्पियनशिप च शानदार प्रदर्शन करदे होई अज्ज सुन्ने दे 2 ते चांदी दा इक तगमा जित्तेआ ऐ।

क्रिकेट च कल भारत, दक्खन अफ्रीका दे कन्नै 2 टेस्ट मैचें दी श्रृंखला दी मेजबानी करग।

<><><><><><>

Bihar Counting

बिहार विधानसभा चुनाएं लेई वोटें दी गिनतरी कल बडुलै 8 बजे थमां शुरू होगा। बिहार दे 38एं जिलें दे 46 मतगणना केंद्रें पर वोटें दी गिनतरी कीती जाह्ग। 243 निर्वाचन हलकें लेई मतदान द'उं चरणें च होआ हा। इलेक्ट्रॉनिक वोटिंग मशीनें गी स्ट्रांग रूम च सख्त सुरक्षा तैहत् रक्खेआ गेदा ऐ। आकाशवाणी समाचार कन्नै गल्लबात च बिहार दे मुख चुनांऽ अधिकारी, विनोद सिंह गुंजियाल होरें गलाया जे मतदान च इस्तेमाल कीती गेदी ईवीएम ते वीवीपैट मशीनें गी त्रै परतें आहली सुरक्षा प्रणाली तैहत् स्ट्रांग रूम दे अंदर सील करी दित्ता गेदा ऐ। उं'नें दस्सेआ जे सबनें मतगणना केंद्रें पर सुरक्षा दे सुद्दे बंदोबस्त कीते गेदे न। श्री गुंजियाल होरें आखेआ जे उचित सुरक्षा जकीनी बनाने लेई, केंद्री थेह्ारबंद पुलिस बल ते

राज्य पुलस दी तैनाती कीती गेदी ऐ। एह्दे अलावा, सीसीटीवी निगरानी ते होरनें सुरक्षा प्रावधान बी कीते गेदे ना। श्री गुंजियाल होरें दस्सेआ जे विधानसभा खेत्तरें च चुनांऽ लेई तैनात निगरान बी मतगणना प्रक्रिया दी निगरानी लेई मतगणना केंद्रें पर मजूद रौह्ङन।

<><><><><><>

PM Cabinet

प्रधानमंत्री नरेंद्र मोदी होरें आखेआ ऐ जे केंद्री मंत्रिमंडल आसेआ निर्यातकें लेई दोआर-गरंटी योजना दी मंजूरी कुल संसारी सतह पर मुकाबलेबाजी गी बढ़ावा देने ते बपार-कारोबार दे बवस्थित संचालन गी जकीनी बनाने सने भारत गी इक आत्मनिर्भर राष्ट्र बनने च बी मदाद करग। सोशल मीडिया दिएं पोस्टें राएं प्रधानमंत्री होरें केंद्री मंत्रिमंडल आसेआ लैते गेदे फैसलें दी सराहना कीती। उ'नें आखेआ जे निर्यात सम्वर्धन मिशन -ई.पी.एम निर्यात सरबंधी मुकाबलेबाजी च सुधार करग। प्रधानमंत्री होरें आखेआ जे महत्वपूर्ण खनिजें लेई रायलिटी दिएं दरें गी युक्तिसंगत बनाने दा केंद्री मंत्रिमंडल दा फैसला स्थिरता ते आत्मनिर्भरता गी बढ़ावा देग। उ'नें आखेआ जे एहू गैहू सप्लाई चेन गी मजबूत करग ते रोजगार दे नमें मौके पैदा करग।

<><><><><><>

Prez Cheetahs

बोत्सवाना ने प्रोजेक्ट चीता दे तैह्त्त भारत गी अज्ज प्रतीकात्मक रूप कन्नै चीते सौंपे। इस मौके पर गेबरॉन दे नेडे नेचर रिजर्व च आयोजित समारोह च राष्ट्रपति द्रौपदी मुर्मु ते बोत्सवाना दे राष्ट्रपति डूमा बोको होर बी मजूद हे। भारत भेजे जाने थमां पैहले एहू चीते किश चिरै लेई क्वारंटीन च रक्खे जाङन। बोत्सवाना, भारत च चीतें दी गिनतरी बधाने च मदाद आस्तै 8 चीते देआ करदा ऐ। प्रोजेक्ट चीता इक अनोखी पैहलकदमी ऐ जेह्दा मकसद दहाकें परैन्त चीतें गी भारत च परतियै बसाना ऐ। सितंबर 2022 च नामीबिया थमां 8 चीतें गी मध्य प्रदेश दे कुनो राष्ट्री उद्यान च आह्न्नेआ गेआ हा। ब'रे 2023 च दक्खन अफ्रीका थमां 12 चीतें गी आह्न्नेआ गेआ हा।

<><><><><><>

PM Koimbtour

प्रधानमंत्री नरेंद्र मोदी औंदी 19 नवम्बर गी तमिलनाडु दे कोयंबटूर जाडन जित्थे ओहू तमिलनाडु दे करसान संघ आसेआ आयोजित दक्खन भारत प्राकृतिक कृषि शिखर सम्मेलन गी संबोधित करडन। प्रधानमंत्री दक्खनी राज्यें दे जैविक कृषि च म्हारथ रक्खने आहले 50 वैज्ञानिकें दे कन्नै गल्लबात करडन। शिखर सम्मेलन च कुदरती खेती लेई व्यापक नीतियां तैयार कीतीआं जाडन। आयोजन समिति दे कोआर्डिनेटर पी.आर. पांडियन होरें आखेआ ऐ जे एह्दे'नै जागरूकता बध्ग ते राई-बाई सरबन्धी बेह्तरनीन तौर-तरीकें गी अपनाने लेई प्रोत्साहन मिलग। इस मौके पर 300 स्टॉलें आहली दक नमैश, मशहूर वैज्ञानिकें ते नीति निर्माताएं आसेआ संवाद सत्र, लाइव प्रदर्शन ते युवाएं ते महिलाएं दी भागीदारी बक्खी टकोह्दा ध्यान दित्ता जाह्ग।

<><><><><><>

US-Govt Shutdown

अमरीका च सबनें शा लम्मा सरकारी शटडाउन खत्म होई गेआ ऐ। संघीय कम्में लेई आरजी तौर पर रपेआ-पैसा उपलब्ध करोआने कन्नै सरबन्धत विधेयक पर राष्ट्रपति डॉनल्ड ट्रम्प हुं'दे दस्तख्त करने परैन्त शटडाउन खत्म होई गेआ। रिपब्लिकन ते डेमोक्रेट्स बश्कार 43एं दिनें थमां चला करदे गतिरोध गी खत्म करने लेई सीनेट ने विधेयक गी मंजूरी दित्ती। अपने इक बयान च अमरीकी राष्ट्रपति डॉनल्ड ट्रम्प होरें आखेआ ऐ जे सरकार हुन अपना कम्मकाज आम ध्याडें आह्ला लेखा करी सकग। उ'नें आखेआ जे 43एं दिनें दे इस शटडाउन ने लोकें गी बड़ी तकलीफ पुजाई ऐ।

<><><><><><>

Srilanka Pakistan

इस्लामाबाद च होए दे जबरदस्त बम्ब धमाके दे बाद सुरक्षा कारणें दा हवाला दि'ंदे होई, इक ध्याडे आहले त्रै क्रिकेट मैचें दी श्रृंखला लेई पाकिस्तान च मजूद केई श्रीलंकाई क्रिकेटरें वापस अपने मुल्ख जाने दी गुजारिश कीती ऐ। इस धमाके च 12 लोक मारे गे हे। एह्दे जोआब च, श्रीलंका क्रिकेट -एसएलसी ने खड्डारि'ं दी गुजारिश गी मंजूर करी लैता ऐ पर उ'नें तय कार्यक्रम दे मताबक श्रृंखला जारी रक्खने दा निर्देश दित्ता ऐ। दौनें टीमें बश्कार इक ध्याडे आह्ला दुआ क्रिकेट मैच कल रावलपिंडी च खेड्ढेआ जाना ऐ। श्रीलंका नै इस म्हीने दी 19 तरीक थमां पाकिस्तान च त्रै मुल्खें आहली टी20 श्रृंखला बी खेड्ढनी ऐ। शुरुआत च एहू

श्रृंखला पाकिस्तान, अफ़ग़ानिस्तान ते श्रीलंका दे बशकार खेड्डी जानी ही पर पाकिस्तान दे कन्नै बन्ने पर संघर्ष दे बाद अफ़ग़ानिस्तान ने श्रृंखला खेड्ढने थमां नां करी दिती ही। हुन, ज़िम्बाब्वे गी त्रीये प्रतिभागी देश दे तौर पर इस श्रृंखला च शामिल कीता गेआ ऐ।

<><><><><><>

SC Stubble Burning

सुप्रीम कोर्ट ने पंजाब ते हरियाणा सरकारें गी पराली फुक्कने पर रोक लाने आस्तै इक स्थिति रिपोर्ट दाखल करने दा निर्देश दित्ता ऐ। भारत दे मुख्ब न्याऽधीश बी.आर. गवई ते न्याऽमूर्ति के.विनोद चंद्रन हुं'दी पीठै राज्यों गी रिपोर्ट दाखल करने दा निर्देश दिं'दे होई आखेआ जे ओहू अगले हफ्ते रश्ट्री राजधानी खेत्तर च वायु प्रदूषण दे मुद्दे पर सुनवाई करग। सर्वोच्च अदालत, मजूदा समें च वायु प्रदूषण पर 1985 च दायर इक याचिका पर सुनवाई करा'रदा ऐ ते फसलें दे अवशेष फुक्कने दा विवाद आह्ला मुद्दा एह्दे थमां गै निकलियै सामने आया ऐ। मामले च इक वकील ने पीठ गी दस्सेआ जे हवा दी गुणवत्ता दे प्रबंधन सरबन्धी आयोग ने ग्रेडेड रिस्पांस एक्शन प्लान ग्रैप-श्री गी लागू कीता ऐ, पर हालात एह्दे बजाय ग्रैप-फोर गी लागू करने दी मंग करा करदे न।

<><><><><><>

EAM South Korean FM

बदेश मंत्री डॉ॰ सुब्रह्मण्यम जयशंकर होरें दिल्ली च लाल किले कश होए दे धमाके दे परैन्त समर्थन ते इकजुटता व्यक्त करने लेई दक्खन कोरिया दे बदेश मंत्री चो ह्यून ते सिंगापुर दे बदेश मंत्री विवियन बालाकृष्णन हुं'दे प्रति आभार व्यक्त कीता ऐ। डॉ॰ जयशंकर होरें सोशल मीडिया दी इक पोस्ट च आखेआ ऐ जे सिंगापुर ते दक्खन कोरिया दिएं भावनाएं दा भारत पूरा-पूरा सम्मान करदा ऐ।

<><><><><><>

Sikkim GI

भारत सरकार ने द'उं पारंपरिक लेप्चा वाद्ययंत्रों - तुंगबुक ते पुमटोंग पुलित - गी जी.आई. टैग प्रदान कीता ऐ। एह्दे'नै सिक्किम दे लेप्चा समुदाऽ गी सांस्कृतिक रूप कन्नै बढ़ावा मिलेआ ऐ। इ'नेंगी जं'दी 5 नवंबर गी भारत सरकार दी जीआई टैग दी संगीत वाद्ययंत्र श्रेणी दे तैह्त् अधिकारिक रूप कन्नै पंजीकृत कीता गेआ। जीआई पंजीकरण प्रमाणपत्र कल नमीं दिल्ली च

संस्कृति, जनजाती मामलें ते उद्योग ते बपार मंत्रालयें आसेआ आयोजित पैहले जनजाती बपार सम्मेलन दे दरान औपचारिक रूप कन्नै पेश कीते गो। तुंगबुक त्रै-तारें आह्ला इक वाद्ययंत्र ऐ, जदके पुमटोंग पुलित बांस कन्नै बनी दी इक बंसरी ऐ। दौनें लेप्चा लोक संगीत दा अननुट्ट अंग न ते इ'दा गैह्ला सांस्कृतिक ते आध्यात्मिक महत्व बी ऐ।

<><><><><><>

Delhi-Metro

दिल्ली मेट्रो रेल निगम नै आखेआ ऐ जे सुरक्षा कारणें करी लाल किला मेट्रो स्टेशन अगली सूचना तगर बंद रौह्ग। सोशल मीडिया पोस्ट च आखेआ गेआ ऐ जे बाकी होर सब्बै स्टेशन सामान्य रूप कन्नै चालू न। ध्यानजोग ऐ जे सोमवार गी दिल्ली च लाल किले कश इक कार च होए दे विस्फोट दे बाद लाल किला मेट्रो स्टेशन गी बंद करी दिया गया हा।

<><><><><><>

Bangladesh Int'l Criminal Tribunal

बांग्लादेश च, अंतर्राष्ट्री अपराध ट्रिब्यूनल ने घोषणा कीती ऐ जे ओहू साबका प्रधानमंत्री शेख हसीना ते उ'दे द'उं सैह्योगियें दे मनुक्खता खलाफ अपराध दे मामले च 17 नवंबर गी अपना फैसला सनाग। एहू तरीक ट्रिब्यूनल-1 दे त्रै मैम्बरें आहले न्यायिक पैनल आसेआ तय कीती गई। ट्रिब्यूनल ने आखेआ ऐ जे एहू फैसला पिच्छले ब'रे जुलाई म्हीने होए दे विद्रोह दे दरान कथित अपराधें कन्नै जुड़े दा ऐ, जिस करी अगस्त च अवामी लीग सरकार दे डिगने शा पैहले व्यापक हिंसा ते राजनीतिक अशांति फैली ही। शेख हसीना हुं'दे कन्नै, साबका गृह मंत्री असदुज्जमां खान कमाल ते साबका पुलस महानिरीक्षक चौधरी अब्दुल्ला अल-मामून पर बी आरोप लाए गे हे। मगरा अल-मामून इस मामले च सरकारी गवाह बनी गेआ। ट्रिब्यूनल ने 23 अक्तूबर गी मुकदमे दी कार्यवाही पूरी करी लैती ही। फैसले शा पैहले ढाका ते आले-दोआले दे इलाकें च सुरक्षा बवस्था सख्त करी दिती गई ऐ। पुलस, सेना ते बॉर्डर गार्ड बांग्लादेश सने क़ानून नाफिज करने आहली एजेंसियें राजधानी च, खासकरियै सरकारी इमारतें, सचिवालय ते ट्रिब्यूनल परिसर दे आले-दोआले बाद्दू चौकियां स्थापित कीतीआं न।

<><><><><><>

NAAC-AL Falah Univer

मूल्यांकन ते मान्यता देने सरबन्धी राश्ट्री काउंसल - नैक ने अज्ज फरीदाबाद च स्थित अल-फलाह युनिवर्सिटी गी अपनी वेबसाइट पर गलत मान्यता अपलोड करने लेई 'कारण दस्सो' नोटिस जारी कीता ऐ। एह्दे च आखेआ गेआ ऐ जे इस युनिवर्सिटी गी मान्यता हासल नेई ऐ। नोटिस च आखेआ गेआ ऐ जे युनिवर्सिटी ने अपनी वेबसाइट पर सार्वजनिक रूप कन्नै प्रदर्शित कीता ऐ जे एह् अल-फलाह चैरिटेबल ट्रस्ट दा इक हिस्सा ऐ, जेह्ड़ा परिसर च त्रै कॉलेज चला करदा ऐ। परिषद ने इब्बी आखेआ ऐ जे एह् जानकारी पूरी चाल्ली गलत ऐ ते अभिभावकें, विद्यार्थिं ते हितधारकें गी गुमराह करने आह्ली ऐ। नैक ने इस बारै च स्पष्टीकरण मंगदे होई युनिवर्सिटी गी अपनी वेबसाइट ते सार्वजनिक रूप कन्नै उपलब्ध जां कुसै बी होरने दस्तावेज राहें नैक दी मान्यता सरबन्धी ब्यौरा हटाने दा निर्देश दिता ऐ। परिषद ने युनिवर्सिटी गी आखेआ ऐ जे ओह् नोटिस हासल होने दे 7एं दिनें दे अंदर अपना जोआब देई देऐ।

<><><><><><>

Manju Bala Banned

भारती हैमर थ्रोअर मंजू बाला पर राश्ट्री डोपिंग रोधी एजेंसी -नाडा दे डोपिंग रोधी अनुशासनात्मक पैनल -एडीडीपी ने बंदिश आहले पदार्थें दे सेवन लेई सकारात्मक परीक्षण दे बाद 5एं ब'रें दी पाबंदी लाई दिती ऐ। 2014 इंचियोन एशियाई खेड्डें च कैह् दा तगमा जित्ते आह्ली मंजू गी डीहाइड्रो-क्लोरोमिथाइल-टेस्टो-स्टेरोन ते एस.ए.आर.एम.एस. एलजीडी-4033 दे सेवन दा दोषी पाया गेआ ऐ। एह् दौनें गै विश्व डोपिंग रोधी एजेंसी - वाडा संहिता दे तैहत प्रतिबंधित न। पिच्छले ब'रे सितंबर म्हीने नाडा ने उं'दे नाकाम परीक्षण गी सार्वजनिक कीता हा ते पिच्छले म्हीने जारी ए.डी.डी.पी. दे फैसले ने उं'दे निलंबन दी तसदीक कीती। पैनल दे मताबक मंजू पर प्रतिबंध 10 जुलाई 2024 थमां 2029 दे मझाटै तोहड़ी लागू रौहगा। इस बंदिश दे कारण ओह् सबनें राष्ट्रीय ते अंतर्राष्ट्रीय प्रतियोगिताएं थमां बाहर होई जाडन।

<><><><><><>

Archery

भारत ने ढाका च 24मीं एशियाई तीरंदाजी चैम्पियनशिप च शानदार प्रदर्शन करदे होई अज्ज सुन्ने दे 2 ते चांदी दा इक तगमा जित्तेआ ऐ। भारती तीरंदाजी संघ दे मताबक दीपशिखा, ज्योति सुरेखा वेन्नीम ते प्रीथिका प्रदीप दी महिला कम्पाउंड टीम ने कोरिया गी 234 दे मुकाबले 236 अंक कन्नै हराइयै सुन्ने दा तगमा जित्तेआ। अभिषेक वर्मा ते दीपशिखा दी मिक्सड् कंपाउंड टीम ने बंगलादेश गी 151 दे मुकाबले 153 अंक कन्नै हराइयै पैहली थाह हासल कीती। अभिषेक वर्मा, साहिल जाधव ते प्रथामेश दी मर्दे दी कंपाउंड टीम गी चांदी दा तगमा हासल होआ ऐ।

<><><><><><>

Cricket

क्रिकेट च कल भारत, दक्खन अफ्रीका दे कन्नै 2 टेस्ट मैचें दी श्रृंखला दी मेजबानी करग। शुरूआती मैच कोलकाता दे ईडन गार्डन्स च खेड्डेआ जाह्ग। शुभमन गिल हुं'दी अगुवाई च भारती क्रिकेट टीम वेस्टइंडीज़ दे खलाफ घरेलू मैदान च क्लीन स्वीप करने मगरा इस श्रृंखला च बी बेहतर प्रदर्शन करने दा पूरा जत्त करग। वर्ल्ड टेस्ट क्रिकेट विश्व कप प्रतियोगिता बी रफ्तार फगड़ा'रदी ऐ ते भारत एहदे च त्रीये थाहूर्रा उप्पर ऐ। भारत ने इंग्लैंड दे खलाफ 2-2 कन्नै ड्रॉ कीता ते वेस्टइंडीज़ गी 2-0 कन्नै शिकस्त दिती। तोआई, मजूदा विश्व चैंपियन दक्खन अफ्रीका दी टीम दा पिच्छले म्हीने पाकिस्तान कन्नै मुकाबला 1-1 कन्नै ड्रॉ रेआ हा।

<><><><><><>

IMD

मौसम विभाग नै केरल ते माहे दी बक्ख-बक्ख थाहें पर तेज बरखा दी पेशगोई कीती ऐ। विभाग नै आखेआ ऐ जे छत्तीसगढ़, पूर्वी राजस्थान ते मध्य प्रदेश च बी शीत लैहर दी स्थिति बनी दी रेई सकदी ऐ। पूर्वोत्तर भारत च हल्के कोहरे आहली स्थिति ते घट्टोघट्ट तापमान च दो थमां त्रै डिग्री सेल्सियस दी गिरावट बी आई सकदी ऐ। तोआई, राष्ट्री राजधानी दिल्ली में ब्हाऽ दी गुणवत्ता बड़ी माझी श्रेणी व बनी दी ऐ। केंद्री प्रदूषण नियंत्रण बोर्ड मुजब अज्ज दपैह्री इक्क बजे तगर औसत ब्हाऽ दी गुणवत्ता सूचकांक 403 दर्ज कीती गेई। ब्हाऽ गुणवत्ता प्रबंधन आयोग नै दिल्ली ते आले-दोआले दे लाह्कें च ग्रेडेड रिस्पांस एक्शन प्लान दे त्रीए चरण गी लागू करी दित्ता ऐ।